

中國方志叢書·華中地方·第七八號

據宋·鄭瑤等撰
清·文瀾閣傳抄本

影印

浙江省

景定嚴州新定續志

(全)

成文出版社有限公司印行



10097817

中華民國五十九年五月壹一版

景定嚴州新定續志

全一冊

發行人：黃 成 助

台北郵政信箱二二六〇五號
出版者：成文出版社有限公司

台北郵政信箱二二六〇五號
台北市羅斯福路三段279之二號
電話：三七〇一三二號

印刷者：東南印製廠有限公司
和平西路二段70巷83弄29號

內政部登記證內版台業字第一一四七號

景定嚴州新定續志十卷

文瀾閣傳抄本

宋鄭瑤方仁榮撰

方逢辰序曰郡之有志所以記山川人物戶口田
賦凡土地之所宜也嚴於淞右爲望郡而界於萬
山之窟厥土堅而隔上不受潤下不升鹵雨則潦
霽則槁厥田則土淺而源枯介乎兩節節級級
如橫梯狀其民苦而耐其俗嗇而野其戶富者畝
不滿百其賦則土不產米民僅以山而入帛官

兵廩則取米於鄰郡以給而百姓日糴則取給於衢婺蘇之客舟較之漕右諸郡其等爲最下下而嚴之所以爲望郡而得名者不以田不以賦不以戶口而獨以雲山蒼蒼江水泱泱有子陵之風在也郡志自淳熙後缺而不修者距今七十餘年矣吳越錢君可則以太府丞來守嚴政事之暇爲之訪蒐以補其缺編削訖事走書屬予爲序予謂嚴爲我太宗皇帝高宗皇帝建旄之地今皇儲

賜履之封則一郡之山川人物風俗戶口田賦職
方氏皆欲究知之矧爲天子聖明勤卹民隱凡州
牧之出辭入覲必詳訪焉是編之作非惟可以備
顧問亦可以少助宵旰民瘼之萬一也

蛟峯集

欽定四庫全書

景定嚴州續志

提要

臣等謹案景定嚴州續志十卷宋鄭瑤方仁榮同撰瑤時官嚴州教授仁榮時官嚴州學錄其始末則均未詳也所紀始于淳熙訖于咸淳標題惟曰新定續志不著地名蓋刊附紹興舊志之後而舊志今佚也嚴州于宋爲

遂安軍度宗常領節度使卽位之後升爲建
德府故卷首載立太子詔及升府省劄體裁
視他志稍殊惟物產之外別增財產一門但
紀景定麥秀四歧一條鄉飲之外別增鄉會
一門但紀楊王主會一條則皆乖義例耳然
敘述簡潔猶輿記中之有古法者其戶口門
中載寧宗楊皇后爲嚴人而鄉會門中亦載
主會者爲新安郡王永寧郡王新安者楊谷

永寧者楊石皆后兄楊次山之子也而宋史
乃云后会稽人當必有悞此可訂史傳之訛
矣乾隆五十一年十月恭校上

總纂官

臣

紀昀

臣

陸錫熊

臣

孫士毅

總校官

臣

陸費墀

景定嚴州續志卷一

宋 鄭瑤等 撰

節鎮

嚴州在國初仍唐舊爲睦州隸吳越建隆元年太宗皇帝以皇弟領防禦使車書混一州隸兩浙西路政和中升建德軍節度宣和三年改州爲嚴州軍爲遂安軍十二月高宗皇帝以皇子領遂安慶源軍節度使詔敕悉載前志翠華駐蹕錢唐郡爲畿輔地望日雄寶祐五年

十一月詔以皇子忠王特授鎮南遂安軍節度使景定元年六月御筆立爲皇太子而此邦節鎮至是愈增重云

皇子忠王授兩鎮節度使制

門下御家者親親所以隆天性之愛詔爵者貴貴所以植宗國之強式稽舊章茂賁元子作眞王而啟宇望已重於承祧易巨鎮以建旄崇莫加於疊組肆涓穀旦誕舉徽章爰咨在列之良式聽揚庭之命皇子崇慶軍節

度使開府儀同三司忠王食邑八十戶食實封三千戶
體凝四氣性備五常言必詩書信矣隆師親友之效動
循法度見諸鳴玉曳履之間雖岐嶷之夙成亦進修之
加益每見晨昏之定省能知宵旰之憂勤契於朕心豈
非天意乃者歲祠重屋祫禮貳觴祖考神祇之顧歆遠
近內外之歡洽豐水數世將益廣於周仁大國十城詎
可拘於漢制洪惟端拱之屬賢嗣常領荆湖而建將壇
庸按版圖丕崇令典新定則我太宗之舊建洪都則我

壽聖之初潛植燾建牙煥陳儀於兩鎮加田陪食仍眎禮於三台以承累世之休以其萬年之福於戲立愛立敬朕非假名器之私克儉克勤爾尙贊邦家之治往服明訓益綏令猷皇子可特授鎮南遂安軍節度使依前職位加食邑一千戶食實封四百戶主者施行

節度使榜

遂安軍節度使應遂安軍管內官吏軍人僧道百姓等茲者仰荷乾尊誕申異命漢眞王之璽綬仍履舊封唐

兼鎮之節旄特昭異數睠嚴陵於左輔實高廟之初潛
祇榮已凜於涉冰延見懼違於問曉洪惟上聖動契天
心謂社稷太平之階積於彊本而父母生民之澤寓在
立親家之安者下之寧近之篤者遠之舉凡爾搢紳多
士介冑連營不體皇恩叶肩職分粵若緇黃之侶暨夫
斑白之氓宜以慈善廣教風宜以孝悌形媿俗諸有尊
屬並存問之右榜遂安軍仍散下管內各令知悉

寶祐五年月日皇子鎮南遂安軍節度使開府儀同

三司忠王押

御筆立忠王爲皇太子

朕祇承統業於今三十有七年夙夜不敢康懼弗克昭
受上帝命惟曩一親郊嗣是明禋凡十有一嚴恭將事
時靡怠遑獨主鬯猶虛孰相大禮恐無以答幽顯之望
皇子忠王仁孝恭順有聞於時涵養踐修尤敏於學是
用蔽自朕志庸正儲闈將以一忱對越在上庶幾祖宗
顧歆神人闔懌哀時多祉予以隆萬世不拔之基可立

爲皇太子仍改名孜其官屬儀物制度令有司討論典禮以聞

立皇太子詔

門下三代治安至千歲所以明有道之長一人元良正萬邦所以衍無疆之慶惟君臣父子之並處實天地祖宗之顧歆朕以眇躬嗣臨大統閱歷春秋之滋久祇勤夙夜以靡渝事會孔殷敢諉興王而啟聖鑒觀於赫終幸福善而禍淫方將嚴禋祀以報稱戒臣工而安佑爰